

ԿԱՆԱԿՈԹԱՌ ԿԱՑԻՆ ԼԵՆԻՆԱԿԱՆԻՑ

ԱՐԱՄ ԳԵՎՈՐԳՅԱՆ, ԼԵՎՈՆ ՊԵՏՐՈՍՅԱՆ

1976 թ. գարնանը Շիրակի պատմության թանգարանի (քաղ. Լենինական) հնագիտական ֆոնդերին ծանոթանալիս մեր ուշադրությունը գրավեց փոքրիկ, բրոնզե կախակոթող կացինը: Քննությունից պարզվեց, որ այն պատկանում է Կուր-Արաքսյան մշակույթի կոթառով կացիների խմբին:

Նկատի ունենալով մ. թ. ա. III հազարամյակում կացիների հազվադեպ լինելը, ինչպես նաև նրանց որոշակի գիտական նշանակությունը, նպատակահարմար ենք գտնում տալ Լենինականի կացնի մանրամասն նկարագրությունը, որը հետագա ուսումնասիրությունների ընթացքում հնարավորություն կընձեռի ավելի լայն պատկերացում կազմելու Հայաստանի վաղ բրոնզեդարյան մետաղագործության զարգացման մակարդակի մասին: Կացինը թանգարան է հանձնվել 1960 թ. և կրում է 2126 գույքահամարը: Այն պատահաբար հայտնաբերվել է Լենինականի մսի կոմբինատի տարածքում, շինարարական աշխատանքների ժամանակ: Հիշյալ տարածքում էլ գտնվում է նախնադարյան այն հուշարձանը, որտեղ առաջին անգամ, 1930-ական թվականներին, պեղումներ է կատարել Ա. Քալանթարը: Նրա հայտնաբերած նյութական մշակույթի ողջ հավաքածուն պատկանում էր ուշ բրոնզեդարյան և վաղ երկաթի ժամանակաշրջաններին¹:


1939 թ. այս հնավայրից հայտնաբերված մեծ քանակությամբ մետաղագործական արտադրանքի նմուշներ հանձնվել են Շիրակի պատմության թանգարան, որոնք հետագայում լայնորեն լուսաբանվել են Հ. Մարտիրոսյանի առանձին աշխատություններում: Այդ հավաքածուն հեղինակը թվագրել է վաղ երկաթի և նրա լայն տարածման ժամանակաշրջաններով²: Նշված հնավայրի և նրա մոտ գտնվող դամբարանադաշտի պեղումները վերսկսվեցին միայն 1952 թ. ՀՍՍՀ ԳԱ պատմության ինստիտուտի արշավախմբի կողմից (ղեկավար Հ. Մարտիրոսյան): Պեղածո նյութերը հիմնականում պատկանում են մ. թ. ա. I հազարամյակի I կեսին, բացառությամբ մեկ բրոնզե դաշույնի, որը հեղինակը համարում էր «հանելուկային» և թվագրում «էնեոլիթյան» ժամանակաշրջանով³: Տ. Խաչատրյանը, Շիրակի հնագիտական մշակույթի վերաբերյալ իր մենագրության մեջ նշում է, որ այս հնավայրից տարբեր ժամանակներում Շիրակի թանգարան հանձնված նյութերի շարքում առկա են նաև մ. թ. ա. III հազարամյակին բնորոշ խեցեգործական արտադրանքի նմուշներ: Նա հնագիտական փաստացի նյութերի հիման վրա հիշյալ հուշարձանը դասում է բազմաշերտ այն հուշարձանների խմբին, որոնց ստորին շեր-

¹ А. А. Калантар, Открытие дохалдского поселения близ Ленинанкана («Проблемы истории докапиталистического общества», 1934, № 9—10, էջ 166—168):

² А. А. Мартиросян, О древнем поселении и могильнике близ Ленинанкана («Краткое сообщение Института истории материальной культуры», 1954, вып. 55, էջ 87—97):

³ Նույն տեղում, էջ 106—116:

տերը պատկանում են վաղ բրոնզի ժամանակաշրջանին⁴։ Հենց այդ՝ վաղ բրոնզեդարյան շերտերից էլ, անկասկած, հայտնաբերվել է քննվող կախակոթառ կացինը⁵։




Նկ 1

Կացինը հիմնականում լավ է պահպանված (նկ. 1)։ Նրա անհարթ մակերեսը պատված է անհավասարաչափ ժանգով։ Աշխատող բերանի որոշ մասերը պինդ մարմինների հարվածելու հետևանքով ծոված են։ Կացնի երկարությունը 15,2 սմ է, քաշը՝ 530 գ, շեղբի վերին մասի լայնությունը՝ 4,5 սմ, իսկ ստորին մասինը՝ 6,5 սմ։ Կոթառային մասը կարճ է և ուռուցիկ, իսկ կոթառը քառանկյունաձև է։

⁴ Գ. Ս. Խաչատրյան, Древняя культура Ширака, Ереван, 1975, էջ 38։

⁵ Կացնի ձևաբանական մանրամասները նկարագրելիս օգտագործում ենք Ս. Կորենևսկու տերմինաբանությունը, որը, մեր կարծիքով, րավական հաջող օգտագործված է Ուրալի լեռնամետալուրգիական շրջանի կոթառով կացինները բնորոշելու համար (Ս. Н. Кореневский, Металлические втульчатые топоры Уральской горнометаллургической области, «Советская археология» (այսուհետև՝ СА), 1973, № 1, էջ 40)։

Կացինը ձուլված է երկփեղկ կաղապարում, ուր ձուլվածքը (բրոնզը) լըցվել է ներսի ճակատի կողմից: Այդ է վկայում նրա արտաքին մասի ամբողջ երկարությամբ ձգվող կարը, որը ներսի կողմում լրիվ բացակայում է: Լուսապատկերային (սպեկտրալ) վերլուծության միջոցով պարզվեց, որ ուսումնասիրվող կացնի մետաղի բաղադրության մեջ բացակայում են կապարը, անագը, ցինկը և բիսմութը, իսկ մկնդեղը կազմում է 1,65 %, որը, անշուշտ, վկայում է մկնդեղային արհեստական բրոնզ ստանալու համար կանխամշտածված արհեստական միացության մասին, հանգամանք, որը խիստ բնորոշ է Կուր-Արաքսյան մշակույթի մետաղամշակությանը⁶: Տվյալ դեպքում քիմիական բաղադրամասերից որոշիչ դեր ունի նիկելի խառնուրդը, որը կազմում է 0,02 %: Հայտնի է, որ վաղ բրոնզեդարյան Հայաստանի հետազոտված մետաղները բաժանվում են երկու մեծ խմբերի՝ ա) նիկելի 0,03 %-ից բարձր պարունակությամբ և բ) 0,02 %-ից ցածր պարունակությամբ մետաղներ: Ուշագրավ է, որ ցածր նիկելային տոկոսայնությամբ մետաղները գոյա-



նկ. 2

տևում են ամբողջ մ. թ. ա. III հազարամյակի ընթացքում, մինչդեռ բարձր տոկոսայնություն ունեցող մետաղե արտադրանքները հանդես են գալիս միայն մ. թ. ա. III հազարամյակի II կեսում⁷:

⁶ А. Ц. Геворкян, Древнейшая металлургия и горное дело Армении (автореферат, М., 1972, էջ 10, 11);

⁷ Նույն տեղում, էջ 11, 13:

Հայաստանի պղնձահանքերի երկրաբանական ուսումնասիրությունները, որը հանրավայրերի մեջ նիկելի պարունակությունը բարձր է հալարերորդական տոկոսային չափերից և միշտ փոքր է 0,03 %-ից⁸։ Այս փաստը ցույց է տալիս, որ լենինականի կացինը, անկասկած, կարող էր ձուլվել տեղական հանքաքարերից ստացված բրոնզից։

Կուր-Արաքսյան մշակույթին պատկանող կախակոթառ կացինները ժամանակին լայնորեն լուսաբանվել են մասնագիտական գրականության մեջ⁹։ այդ իսկ պատճառով հարկ չենք համարում անդրադառնալ դրանց։ Տվյալ դեպքում մեզ հետաքրքրում է միայն մեկը, որը հայտնաբերվել է Մեջվրիսխեթից¹⁰։ Խնդիրն այն է, որ լենինականի և Մեջվրիսխեթի կացինները խիստ նման են միմյանց, եթե չլինել նրանց կոթառների էական տարբերությունը, ապա կարելի էր մտածել, որ դրանք ձուլվել են միևնույն կաղապարում։ Մեջվրիսխեթի կացինի (նկ. 2) կոթառը օղակաձև է, իսկ լենինականինը՝ քառանկյունաձև։ Առաջմ դժվար է հիմնավոր բացատրել այդ փաստը, քանի որ ինչպես Կուր-Արաքսյան, այնպես էլ նրա հարևան շրջանների համաժամանակյա մշակույթներում չեն հայտնաբերվել քառանկյունաձև կոթառով կացիններ։ Մնում է ենթադրել, որ այն բերվել է այլ անհայտ վայրից, կամ էլ հանդիսանում է տեղի մետաղագործ-արհեստավորի յուրօրինակ արտադրանքի արգասիք։ Փաստացի զուգահեռների բացակայության պայմաններում մենք հակված ենք այն համարել տեղական արտադրանքին բնորոշ երևույթ։

Այժմ համառոտակի անդրադառնանք կացինի թվագրման հարցերին։ Ինչպես հայտնի է, սկզբում կախակոթառ կացինները թվագրվում էին մ. թ. ա. III—II հազարամյակների սահմանազիխով¹¹։ Հետագայում Կուր-Արաքսյան մշակույթին պատկանող հուշարձանների պեղումների ընթացքում հայտնաբերված բազմահարուստ ու արժեքավոր նյութերի հիման վրա հնարավոր եղավ առանձնացնել նրանց միջև գոյություն ունեցող շերտագրական ու ժամանակագրական տարբերությունները, որոնք, իրենց հերթին, օգնեցին ըստ ժամանակաշրջանի դասավորելու բրոնզե կացինները։ Այսպես, դեռևս 1961 թ. Օ. Զախարիձեն Մեջվրիսխեթի կացինը թվագրել է մ. թ. ա. XXVI—XXIV դդ.¹²։ Կ. Քուլչարյովան և Տ. Չուբինիշվիլին նույն կացինը և նրա զուգահեռները թվագրել են մոտավորապես նույն ժամանակաշրջանով¹³։ լենինականի կաց-

⁸ А. Ц. Геворкян, О древнейшей меднорудной базе Армении (СА, 1973, № 4, էջ 33—39)։

⁹ Д. Л. Коридзе, Новые находки медных орудий в Квемо-Картли (СА, 1958, № 1, էջ 134—140), А. А. Мартirosян, К предистории древнейших этапов культуры Армении («Պատմա-բանասիրական հանդես», 1960, № 1, էջ 92—96), С. А. Есаян, Оружие и военное дело древней Армении, Ереван, 1960, шл. 6, նկ. 1—6, է. 4. Խանդավազյան, Հայկական լեռնաշխարհի մշակույթը մ. թ. ա. III հազարամյակում, Երևան, 1967, էջ 47—54։

¹⁰ Б. А. Куфтин, Археологические раскопки в Тrialeti, I, Тбилиси, 1941, էջ 6, նկ. 16, Д. Л. Коридзе, նշվ. աշխ. էջ 139։

¹¹ Б. А. Куфтин, նշվ. աշխ., էջ 16, Д. Л. Коридзе, նշվ. աշխ., էջ 139։

¹² О. М. Джапаридзе, К истории грузинских племен на ранней стадии медно-бронзовой культуры, Тбилиси, 1961, էջ 262 (վրացերեն)։

¹³ К. Х. Кушнарева, Т. Н. Чубинишвили, Древние культуры Южного Кавказа, Л., 1970, էջ 122։

նի և նրա զուգահեռների մանրագնին ուսումնասիրությունները մեզ ևս հանգեցրին այն կարծիքին, որ քննվող կացինը կարելի է թվագրել մ. թ. ա. III հազարամյակի կեսերով: Այս կացնի թվագրության հարցը հնարավոր կլինի վերջնականապես ճշտել միայն այն ժամանակ, երբ կուսումնասիրվեն լենինականի մսի կոմրինաաի շրջակայքի հուշարձանի ստորին շերտերը:

ВИСЛООБУШНЫЙ ТОПОР ИЗ ЛЕНИНАКАНА

АРАМ ГЕВОРКЯН, ЛЕВОН ПЕТРОСЯН

Резюме

В музее истории Ширака хранится топор, представляющий определенный научный интерес для металлургического производства Армении III тыс. до н. э. Типологически он в целом напоминает широко распространенные вислообушные топоры Куро-Араксской культуры, но некоторые его морфологические признаки, в особенности прямоугольное сечение втулки, придают ему специфичность, объясняемую, на наш взгляд, технологической традицией той мастерской, в которой он изготовлен.

Спектральное исследование показало, что по своему химико-металлургическому составу топор отлит из низконикелистых руд с добавлением к ним 1,65% мышьяка. Рассматриваемый топор предварительно можно датировать серединой III тыс. до н. э.